



Gabinete de Comunicação e Relações Públicas

“Seja um bom cidadão, seja um novo herói para a nossa Nação”

KOMUNIKADU IMPRENSA

Díli, 05 Janeiro 2015

Aprovasaun Unánimidade ba Orsamentu Jerál Estadu tinan 2015

Orsamentu Jerál Estadu tinan 2015 hetan aprovasaun ho unânimidade husi membru Parlamentu Nasional nain neen-nulu resin lima (65) iha loron 18 Dezembru 2014, iha loron hirak molok tama ba Natal no semana rua molok tinan 2014 remata. Okaziaun ne'e sai nu'udar momentu históriku ida tan ba iha prosesu orsamental Timor-Leste nian, iha ne'ebé interese nasional hatur ás-liu husi diferéncia política. Ida ne'e ba dala-tolu ona Opozisaun vota afavor ba Orsamentu Jeral Estadu.

Orsamentu Jerál Estadu tinan 2015, ne'ebé bazeia ba prinsípiu sustentabilidade fiskal, kapasidade ezekusaun no kapasidade abzorsaun ekonómiku, inklui qualidade orsamental, sei kontinua suporta política *front-loading* Governu nian hodi investe iha desenvolvimentu rekursu umanu no projeitu infraestrutura ne'ebé prioriza ona. Seitor rua ne'e sai nu'udar pilar fundamental ne'ebé sustenta kresimentu ekonómiku inkluzivu no sustentável, kriasaun kampu servisu, prestasaun servisu no seitor produtivo embrionariu Nasaun nian.

Governu kaer-metin nafatin ba promove partisipasaun sidadaun sira nian iha asuntu Estadu liu-husi forñese transmisaun direita debate Orsamentu Estadu ba tinan 2015 iha televizaun no rádio ba povu iha teritóriu tomak. Ministériu Finansas, ne'ebé lidera husi ministra Emília Pires, akompaña prosesu tomak orsamentu nian, inklui partisipa iha diskusaun iha Komisaun Eventual Parlamentu Nasional nian, ne'ebé estabesele hodi koalia no tau iha konsiderasaun preokupasaun hotu-hotu ne'ebé membru Parlamentu sira hatu'o liu-husi proposta alterasaun.

Total orsamentu aprovaudu ba tinan 2015 hamutuk \$1,57 biloens dólares amerikanu. Husi montante ne'e, \$441 miloens aloka ba desenvolvimentu infraestrutura bo'ot sira, enkuantu \$536 miloens tau-ba Beins no Servisus, ne'ebé inklui \$41 miloens ba Fundu Desenvolvimentu Kapital Umanu hodi finansia bolsas estudus, formasaun profesionál no asisténsia téknika ba seitor judisial no ensinu superior.

Governu mós aloka \$406 miloens ba Transferénsia Pública hodi selu pensaun, subídiu ba katuas-ferik, veteranus, famílias monoparentes, ki'ak, grupu vulnerável no seluk-seluk tan. Inkui mós iha montante ida ne'e verba ida ho montante \$81,9 miloens ba Autoridade Rejiaun Administrativa Espesial Oé-cusse Ambeno, modelu projeitu pilotu ba ekonomia sosial merkadu ida, ne'ebé lidera husi Dr. Mari Alkatiri, para halais desenvolvimentu ekonómiku inkluzivu iha Oé-cusse. Valor orsamentu refere sei kontribui mos ba desenvolvimentu infraestrutura báziku hodi estimula no promove investimentu iha rejiaun refere.

Fundu Petrolíferu sei kontinua dezenpeña papél importante iha política Governu nian ba iha prosesu desenvolvimentu nasional. Notísia di'ak ida mai ita maka kuaze 70% husi Orsamentu Estadu tinan 2015 ne'e finansiadu husi retornu investimentu \$915 miloens no reseitas doméstikas \$170 miloens. Ida ne'e hatudu katak Timor-Leste hahú la'o ona iha dalan los ba atinji sustentabilidade fiskal - IKUS